

**Ebazpena: R050/2023**

**Espedientea: 17/2017**

Vitoria-Gasteizen, 2023ko maiatzaren 8an.

Euskal Autonomia Erkidegoarekiko Ekonomia Ituneko Arbitraje Batzordea honakoek osatzen dute: Violeta Ruiz Almendral presidenteak, eta Sofía Arana Landín eta Javier Muguruza Arrese bokalek. Eta honakoa erabaki dute:

## **ERABAKIA**

Zerga Administrazioako Estatu Agentziak (aurrerantzean, ZAEA) Arabako Foru Aldundiaren (aurrerantzean, AFA) aurka planteatutako gatazkari buruzkoa, zeinaren helburua baita zehaztea TFSL zergapekoak BCMM andreari 2012ko lan pertsonalaren atxikipenen ordainarazpen-eskumena. Gatazka hori Arbitraje Batzorde honetan izapidetzen ari da, 17/2017 espediente-zenbakiarekin.

## **I. AURREKARIAK**

- 1.-** TFSL Araban egoitza duen sozietatea da, eta hozkailu-biltegiak fabrikatzen ditu.
- 2.-** 2016ko otsailaren 19an, ZAEAk prozedura bat hasi zuen, BCMM andreari (administrazio-zerbitzuak lurralde erkidean soilik egin omen zituen) 2012tik 2014ra egindako atxikipenen ordainarazpena egiaztatzeko.
- 3.-** 2017ko urtarrilaren 25ean eskumenik ez duen Administrazioan sartu izanaren txosten bat egin zen, atxikipen horiek AFAn sartu zirelako.

4.- 2017ko martxoaren 3an, ZAEAk kopuru horiek bidaltzea eskatu zion AFari.

5.- 2017ko martxoaren 9an, AFAk 2012ri eskabideari uko egin zion preskripzioagatik, eta 2013 eta 2014koa ebazteke utzi zuen.

6.- 2017ko maiatzaren 3an, ZAEAk inhibititu zedila eskatu zion AFari, aipatutako langilearen 2012ko lan-atxikipeak ordainarazteko eskumenari zegokionez.

7.- AFaren isilbidezko berrespenaren aurrean, ZAEAk 2017ko ekainaren 20an gatazka planteatu zuen Arbitraje Batzordean, eta 17/2017 espediente-zenbakia esleitu zaio hari, eta prozedura arruntaren bidez izapidetu da.

## II. ZUZENBIDEKO OINARRIAK

### 1.- Arbitraje Batzordearen eskumena

Arbitraje Batzordeak eskumena dauka gatazka hau ebazteko, Ekonomia Itunaren 66.Bat artikuluan xedatutakoaren arabera; artikulua horrek eginkizun hauek ezartzen baitizkio batzorde horri:

*a) Estatuko Administrazioaren eta foru-aldundien artean edo foru-aldundien eta beste autonomia-erkidegoetako administrazioen artean sortzen diren gatazkek ebaztea, bai tributu itunduen lotuneen aplikazioari dagokionez, bai administrazio bakoitzari zenbateko zatia dagokion zehazteko, sozietateen gaineko zergaren edota balio erantsiaren gaineko zergaren baterako tributazioaren kasuetan.*

*b) Banakako tributu-harremanetako arazo zehatzetan ekonomia-itun hau interpretatzeko eta aplikatzeko orduan administrazio interesdunen artean sor litezkeen gatazkak erabakitzea.*

*c) Zergadunen egoitza dela-eta sor litezkeen desadostasunak ebaztea.*

## 2.- Preskripzioa

Auzitegi Gorenaren jurisprudentzia baketsuak (besteak beste epai hauetan biltzen da: 2015eko abenduaren 15ekoa (ECLI: ES: TS: 2015:5337), 2022ko otsailaren 10ekoa (ECLI: ES: TS: 2022:596), 2020ko abenduaren 3koa (ECLI: ES: TS: 2020:4077), 2021eko urtarrilaren 28koa (ECLI: ES: TS: 2021:372) eta 2020ko maiatzaren 18koa (ECLI: ES: TS: 2020:1010)) adierazten du zerga-kreditu juridikoaz gain badagoela administrazioen arteko zuzenbide publikoko kreditu bat eta, horren arabera, eskumenik ez duen administrazioan bidegabeko diru-sarrera egiten den unean hasten dela kontatzen erreklamatzeko preskripzio-epea eta epe horren preskripzioa ez dela eteten hirugarren batek (zergapekoak) egindako jarduketengatik edo hirugarren hori dela-eta.

Administrazioen arteko kredituaren aurreneko erreklamazioa 2017ko martxoaren 3an egin zenez, preskribatuta leudeke errekerimendu hori baino 4 urtetik gora lehenago ordaindutako atxikipenak, hau da, 2012ari dagozkienak.

Horiek horrela, Arbitraje Batzordeak

**ERABAKITZEN DU**

1.- Preskribatutzat jotzea ZAEaren administrazioen arteko zuzenbide publikoko kreditua, TFSLk AFAn bidegabeki sartu zituen BCMM andre enplegatuaren 2012ko lan-atxikipenei dagokiona.

2.- Erabaki hau Zerga Administrazioko Estatu Agentziari, Arabako Foru Aldundiari eta TFSLri jakinaraztea.